

آخر كلمه

آخر كلمة ما بيني وبينك

خلّي شعاع الشمس... يزهر.. بين سرايينك

خلّي خيوط الفجر.. تنور .. نظرة عينك

خلّي حروف العشق

تنام .. ف سطور دواوينك

آخر كلمه.. من أشواقي ..

حبك باقي .. نبضه ف قلبي

سر ما بين أوراقك .. وبينك

لو بأيديا .. كل ما شوفك

هابعت ألف رسالة شوق

من عطر كفوفك

هاكتب مليون كلمة حب

وأقولها لطيفك

أغزل شعري .. ستاير فرح ..

تداري كسوفك

..

هاتصدقني لو قلت لك

كل ما افكر فيك .. بانساني

واحيا اللحظة

اللي لنن عنيك وخداني

واوصل حبك جوه لقلبي ولوجداني

هاتصدقني

لو هاتمر علينا سنين

ولاً هانسمع ألف حكاية عن العاشقين

حبي وحبك

لو نرويه .. أو نوصف فيه

عايزين م الأوراق ملايين